

Silvester – sünner Krach un Böller?

van Erhard Brüchert

Kann ik ok Silvester fiern sünner Knalleree un Pyrotechnik, de vandag tja sowieso nix besünners meer is, wenn ik an de Footballspeele elke Saterdag in de „Sportschau“ denken do? Dor hebben wi Silvester al elke Weekenend. Un wenn ik ok bedenken mutt, dat Döner un Explosionen in de Lücht in dat verleden Jahr 2023 nix anners west sünd as malle Teken van Orlog, Verbreken, Doden un Dummheet överall in de malle Welt. Wo sall ik dor nu an de Kipp-Point van een Jahr na de anner henn blied wesen över dat verleden Jahr – un toglieke Tiet munter Utkiek up dat Jahr 2024 hollen?

Ik weet also noch nich so genau, wat för mi dat Klookste an Silvester is: Sall ik in Huus sitten, un bit Klock Twee ant 1. Januar blots NDR-Kultur höörn mit Bach-Kantaten? Or sall ik üm Klock Elben an Silvester slapen gahen – mit ´n Sluck warm Water - un vorher alle Fenster un Döörn verrarmeln, so dat ik de Böllerei van buten nich mitkiegen do? Un mien aarm Katt ok nich! Or sall ik noch fell na Helgoland verreisen, wor ik bi dat Storm- un Windgebruus an de Klippen vör de „Lange Anna“ nix mitkieken do van all de Krach-Lü in Ollnborg un Oostfreesland? Or sall ik noch fell mi bi de „Silvester-Neejohrs-Lop“ ründ ümto van de Thülsfelder Talsperre anmelden - un dor noch ´n Medaille winnen?

Jo, ik glöow, so een Lop in de stille Nacht üm de Talsperre weer woll dat Beste för mit. Dorbi mutt ik nich Alkohol bi supen... mach ik tja sowieso nich... dat köst nich sovöl as na Helgoland schippeln... dor lop ik in de stille Nacht sinnig över de Diek in Thülsfelde mit ´n lüttje Taschenlamp in de rechte Hand... un mit en ´n Handwarmer in de linke. Dor mutt ik denn nich so frösten, un bi de Renneree sowieso nich. Un wenn denn sogar de Maand schienen deiht, denn kann ik al glieks dorbi Utkiek hollen in de mojje Heide-Natur üm mi to – so, as up de mojje Tokunft van dat neeje Jahr 2024.

Man – as ik dat mien Fro verkloren wull, dor meen se blots: „Wat för krumme Ideen hest du dor an Silvester... un dat in dien Öller! Blijf man lever in Huus, up ´n Sofa, bi mi! Dor kriggst du ok satt „Berliners“ un Glüh-Wien sünner Alkohol!

(van Erhard Brüchert)

(oostfreesk Platt)